

## AMIGANZIA

Da-e sa corriera 'e su tempus  
medas amigos sun falados:  
non sempre, a dogni frimmada,  
un'ateru est pigadu, a sostituire  
cuddu appenas faladu.

De totu cantos sun chi sos mancados  
parizzos sun in mente giatados  
ca totu cantu su chi m'ana dadu  
no est cosa chi podiat isvanire.

Su giogu 'e sa vida, lampizende,  
pianas e lughidas at fattu  
sas carrelas ue apo caminadu  
cun su coro ispasimadu de amore,  
e ogni olta chi so ruttu,  
sempre, una manu de amigu  
mi at pòrridu s'agiudu  
a mi nde pesare. Amigos caros,  
chi in s'ammentu meu ispassizades,  
totu sezis bios in su coro.

De totu cuddos isparidos  
unu nde 'ido, giaru e nettu,  
in gropa a unu muletto abissinu,  
chi, cando podiat, a puddiles  
da-e Abba Garima tuccaiat, pro 'ènnere  
a m'accioppare a Adua.  
A s'abbogiu fin pagas sas paraulas:  
nos bastaiat un'isganzada 'e risu,  
s'abbrazzu: e-i su coro cantaiat!

Oe, cando ando a campusantu  
e mi frimmo addainanti de sa sua  
fotografia, su coro mi s'istringhet!  
Ma pro pagu, ca fàghet s'ammentu  
pena e dolore appasigare.  
E torro a bider Adua e-i sos montes  
ch'in giru in giru li faghen corona,  
e unu giovanu serzente, allegro e forte,  
chi cun s'abbrazzu mi daiat su coro.

## AMICIZIA

*Dalla corriera del tempo / molti amici son discesi: / non sempre, ad ogni  
fermata, / un altro è salito, a sostituire / quello appena disceso. / Di tutti quelli  
scomparsi / parecchi nella mente sono incisi / ché tutto quello che essi mi  
hanno dato / cosa non è che si possa scordare.*

*Il gioco della vita, lampeggiando, / piane ha fatte e luminose / le strade ove ho  
sempre camminato / col cuore spasimato d'amore, / e ogni qualvolta son  
caduto, / sempre, una mano d'amico / si tese a rialzarmi. Amici cari, / che nella  
mia memoria passeggiate, / tutti siete vivi nel mio cuore.*

*Di tutti quelli scomparsi / uno ne vedo, chiaro e netto, / in gropa ad un muletto  
abissino, / che all'alba, quando poteva, / lasciava Abba Garima, per venire /  
ad incontrarmi ad Adua. / Nel rivedersi poco si parlava: / bastava un accenno  
di sorriso, / l'abbraccio: e il cuore cantava!*

*Oggi, quando vado al cimitero / e mi fermo davanti alla sua foto, / il cuore mi  
si stringe, ma per poco, / ché il ricordo riprende il sopravvento. / Adua rivedo  
e le sue alte montagne / che d'un cerchio di sogno la recingono, / e un giovane  
sergente, allegro e forte, / che nell'abbraccio mi offriva il cuore.*